



Il quintet da la giuria: Annetta Zini, Carmen Dedual, Silvana Derungs, Anna-Alice Dazzi e Gianna Olinda Cadonau.

FOTO RTR

#rtrpled14: «Far linlogn»

■ (rtr) «Far linlogn» (pronunzia: lin-lògn) munta «sa laschar temp per far insatge» – ed è in cunterprogram al stress da mintgadi, uschia las tschintg giuroras da l'acziun #rtrpled14 en lur argumentaziun. Ellas han tschernì il pled rumantsch da l'onn 2014 dad exactamain 100 differents peds che las auditoras ed ils auditurs da Radiotelevision Svizra Rumantscha avevan tramess enfin gievgia a mezdi.

«Schumellins» sco ils schumellins nobels a Monaco, «huldi» per rument u «margnac», descrit cun «Dummkopf, ma herzig» – las propostas da las auditoras e dals auditurs dad RTR per il pled rumantsch dal 2014 èn stadas uschè sgagliadas sco l'onn che è prest passà. Las propostas èn arrivadas da l'entir Grischun e perfin da la Bassa. Nagina missiun simpla per las dunnas da la giuria da #rtrpled14 da sa decider per mo in pled. Duas uras han fimà ils chaus, lura era la tscherna dal «far linlogn» clera per Annetta Zini, Silvana Derungs, Anna-Alice Dazzi, Gianna Olinda Cadonau e Carmen Dedual.

Tenor il quintet da la giuria ha «far linlogn» in dubel connex cun il mund actual: d'ina vart il cunterprogram al stress dal mintgadi (correspondent al pled tudestg «Entschleunigung»); da l'autra vart represchenta l'expressiun «l'aura fa linlogn» (l'aura fa tge ch'ella

vul) l'onn meteorologic 2014. Ultra da quai tuna il pled tenor las dunnas fitg bain e funcziuna en tut ils idioms – era sch'el n'è betg enconuscent en mintga regiun.

Betg mo che il pled vegn ad esser in dals proxims peds novs en il Pledari Grond – na, a ses emprim grond di è el gist anc vegnì undrà cun ina chanzun resch nova. Il rapper engiadinais Gino Clavuot alias Snook aveva numnadamain surpiglià ina sfida tut speziala: crear in nov rap rumantsch e quai cun duvrar almain 12 da quels peds ch'il public dad RTR ha inoltrà per #rtrpled14. L'experiment è gartegià. Da peds uschè differents sco «immigraziun da massa», «bräina», «selfie» u «cumünanza» ha el svilup-pà ensemen cun las moderaturas e chantaduras Alice Bertogg e Gaby Degonda il rap «Biodiversità» – e quai en mo sis uras, tut auter che «fatg linlogn».

Gudagnà ha denton er il public: Marita Bürkli da Laax ha gudagnà cun ses pled «far linlogn» la concessiun da radio e televisiun per in onn. Gudagnà l'abunament per La Quotidiana ha Andrea Rodigari da Müstair («cuntradiziun»), ed il bon da cudeschs da la Lia Rumantscha va a Ida Janigg da Paspels («schischuri»).

Il pli nov rap rumantsch «Biodiversità» ed il «di dal pled rumantsch» en tut sias fassetas chattais vus sin www.rtr.ch